



40 ribu pengunjung banjiri Jom Masuk U Zon 7

Hampir 40 ribu pengunjung di kalangan pelajar, guru, ibu bapa dan masyarakat membanjiri Sultan Ahmad Shah International Convention Center (SASICC) Kuantan pada 16 hingga 17 Mac 2013 yang lalu bagi mendapatkan manfaat dan informasi terkini berkaitan permohonan masuk ke institusi pengajian tinggi (IPT), Politeknik dan Kolej Komuniti, maklumat akreditasi serta bentuk pembiayaan permohonan pelajar bersempena Karnival Pengajian Tinggi Negara 2013 (KPTN), Jom Masuk U Zon 7.

Antara yang menarik adalah pameran 1Dream2U, kuiz, aplikasi dalam talian, seminar sehari peluang pengajian tinggi dan peluang berkunjung menyaksikan 150 ruang pameran dari seluruh institusi pengajian tinggi awam dan swasta termasuk agensi berkaitan pendidikan yang dibuka khas bermula mulai jam 9 pagi hingga 5 petang setiap hari.

Naib Canselor Universiti Malaysia Pahang (UMP), Profesor Dato' Dr. Daing Nasir Ibrahim berkata, penganjuran program KPTN bagi tahun ini melibatkan 11 zon mengikut lokasi yang ditetapkan seluruh negara dan sekali lagi Pahang dipilih menjadi tuan rumah serta UMP menjadi urus setia bersama

Kementerian Pengajian Tinggi (KPT) dan Kementerian Pelajaran Malaysia (KPM).

Katanya, mulai kemasukan pelajar sesi akademik 2013/2014, UMP akan menawarkan dua program baharu iaitu Sarjana Muda Teknologi Kejuruteraan (Farmaseutikal) dengan Kepujian di bawah Fakulti Kejuruteraan Kimia & Sumber Asli dengan kerjasama Institut Technology Tallaght, Republic of Ireland.

“Satu lagi adalah Sarjana Muda Teknologi Kejuruteraan (Pengurusan Infrastruktur) dengan Kepujian di bawah Fakulti Kejuruteraan Awam & Sumber Alam (FKASA) dengan kerjasama University of Southern Queensland, Australia,” katanya dalam sidang media yang turut dihadiri Ketua Pengarah Jabatan Pengajian Tinggi, Profesor Dato' Dr. Rujhan Mustafa.

Hadir sama Timbalan Naib Canselor (Akademik & Antarabangsa), Profesor Dato' Ir. Dr. Badhrulhisham Abdul Aziz, Ketua Pengarah Jabatan Pengajian Politeknik, Mejar (K) Haji Md. Nor Yusof dan Pendaftar UMP, Haji Mustafa Ibrahim.

Katanya, sehingga kini terdapat 32 program akan ditawarkan oleh UMP bagi pengambilan pelajar di peringkat prasiswazah

sesi akademik ini iaitu 27 daripadanya adalah program di peringkat Ijazah Sarjana Muda dan lima program di peringkat Diploma.

Tambah beliau, UMP bakal menawarkan program yang merupakan satu-satunya bidang yang masih baharu untuk memenuhi keperluan negara, iaitu program Dwi-Ijazah Sarjana Muda Kejuruteraan Perniagaan (Business Engineering) hasil kerjasama UMP dengan Reutlingen University, (RU) Jerman yang bakal ditawarkan pada tahun hadapan.

Dato' Dr. Daing turut melahirkan rasa bangga dengan pencapaian peratusan kebolehpasaran graduan UMP pada tahun lalu yang mencatatkan pencapaian 79 peratus dalam tempoh enam bulan selepas bergraduat.

karnival ini dapat membantu pelajar memperoleh sumber yang lebih tepat dan memudahkannya memilih program yang bersesuaian untuk meneruskan pengajian